

Լուսինե Ալոյան

Պարույր-կծիկ անցումը ԴՆԹ-ի մոլեկուլում

ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆ

ԼՈՒՍԻՆԵ ԱԼՈՅԱՆ

ՊԱՐՈՒՅՐ-ԿԾԻԿ ԱՆՑՈՒՄԸ ԴՆԹ-Ի ՄՈԼԵԿՈՒԼՈՒՄ

Ուսումնամեթոդական ձեռնարկ

ԵՐԵՎԱՆ ԵՊՀ ՀՐԱՏԱՐԱԿՉՈՒԹՅՈՒՆ 2024

Հրատարակության է երաշխավորել ԵՊՀ գիտական խորհուրդը։

Գրախոսներ՝ տեխ.գ. դոկտոր, պրոֆեսոր՝ Հ. Ռ. Դրմեյան ֆ.մ.գ. դոկտոր, պրոֆեսոր՝ Յու. Ս. Բաբայան ֆ.մ.գ.թ., դոցենտ՝ Գ. Վ. Անանյան

Լ.Ռ. Ալոյան

Ա **327 Պարույր-կծիկ անցումը ԴՆԹ-ի մոլեկուլում**։ Ուսումնամեթոդական ձեռնարկ/Ալոյան Լ.Ռ.։ -Եր., ԵՊՀ հրատ., 2024, 50 էջ։

Մույն ձեռնարկը բուհական ծրագրով նախատեսված «Մակրոմոլեկուլների հետազոտման մեթոդները» դասընթացի մի մասն է, որտեղ հիմնականում շարադրված են կենսաֆիզիկական այն հարցերը, որոնք նախատեսված են ԵՊՀ ֆիզիկայի ինստիտուտում այդ առարկայի դասավանդման ծրագրերով։

Ձեռնարկի գլխավոր նպատակն է ուսանողներին ներկայացնել կյանքի «կարևորագույն մոլեկուլի»՝ ԴՆԹ-ի պարույր-կծիկ անցման՝ դենտուրացիայի երևույթը և դրա ուսումնասիրման մեթոդներից երկուսը։

Ուսումնական ձեռնարկը նախատեսված է բուհերի ֆիզիկայի, կենսաբանության և քիմիայի ֆակուլտետների բակալավրիատի ուսանողների, ինչպես նաև մագիստրոսների համար։ Այն կարող է օգտակար լինել նաև հարակից բնագավառներում մասնագիտացող ուսանողների և հանրակրթական ու միջին մասնագիտական ուսումնական հաստատություններում դասավանդողների համար:

> ՀՏԴ 577.323.7(075.8) ዓሆጉ 28.071.0g73

ISBN 978-5-8084-2663-4

DOI: https://doi.org/10.46991/YSUPH/9785808426634

© ԵՊՀ հրատ., 2024 © Ալոյան Լ.Ռ., 2024

ՆԵՐԱԾՈՒԹՅՈՒՆ

Մեր ժամանակներում «ԴՆԹ» (դեզօքսիռիբոնուկեինաթթու) բառը դարձել է սովորական, առօրյա կիրառելի եզրույթ։ ԴՆԹ-ի մոլեկույի շուրջ տիրում է իսկական իրարանցում։ Ներկայումս հազարավոր լաբորատորիաներ, կենսատեխնոլոգիական և դեղագործական ընկերություններ զբաղվում են արտադրությամբ։ Հազարավոր մասնագետներ «ԴՆԹ»-ի զբաղվում են գեների մանիպուլյացիաներով և այդ մանիպուլյացիաների արդյունքների գործնական կիրառման նորանոր հնարավորությունների փնտրտուքով։ Իսկ այս ամենը սկսվել է մի կարձ, մեկ էջից բաղկացած գրառումից, որը տպագրվել էր «Nature» ամսագրում 1953 թվականի ապրիլի 25-ին՝ հեղինակված Ջելմս Ուոթսոնի և Ֆրենսիս Քրիքի կողմից։ Նրանք առաջինն էին, որ հատեցին վերջնագիծը այս գիտական մրցավագքում, մինչդեռ այլ գիտնականներ նույնպես փորձում էին գտնել ԴՆԹ-ի կառուցվածքի Ճիշտ մոդելը։ Ֆիզիկոսները սկսել էին ԴՆԹ-ի մոլեկուլի ուսումնասիրությունը ոչ միայն այն պատճառով, որ հասկանում էին դրա կառուցվածքի բոլոր մանրամասները բացահայտելու կարևորությունը, այլև ԴՆԹ-ի մոլեկուլը ինքնին շատ ուշագրավ էր։

Հաբորատորիայում նոր փորձեր անելու փոխարեն` Ուոթսոնը և Քրիքը հիմնականում հավաքեցին, վերլուծեցին և միավորեցին առկա տվյալները։ ԴՆԹ-ի կառուցվածքի ամենակարևոր հուշումներից մի քանիսը ստացել էր Ռոզալինդ Ֆրանկլինը` կին կենսաքիմիկոս, որն այն ժամանակ աշխատում էր ֆիզիկոս Մորիս Ուիլկինսի լաբորատորիայում։

Ֆրանկլինը մոլեկուլների կառուցվածքի որոշման՝ ռենտգենյան դիֆրակտամետրիայի փորձագետ էր։ Ռենտգենյան դիֆրակտամետրիան (ռենտգենյան կառուցվածքային անալիզ) ռենտգենյան ձառագայթների օգտագործումն է բյուրեղի մոլեկուլային կառուցվածքի բացահայտման նպատակով։ Այն հիմնված է ռենտգենյան ալիքի դիֆրակցիայի երևույթի վրա, այն է՝ ռենտգենյան ձառագայթի դիֆրակցիան բյուրեղի ատոմային կառուցվածքի վրա։ Եթե մոլեկուլը (օրինակ՝ ԴՆԹ) բյուրեղացվում է և ձառագայթվում է ռենտգենյան ձառագայթներով, ապա ձևավորված դիֆրակցիոն պատկերը կարելի է օգտագործել մոլեկուլի կառուցվածքը բացահայտելու համար։



u)

Uy. 1.

F)

ա) Ռոզալինդա Ֆրանկլին, ԴՆԹ-ի առաջին ռենտգենագրի հեղինակ բ) ԴՆԹ-ի կրկնակի պարուրային կառուցվածքը ներկայացնող ռենտգենագիր, որտեղ դիֆրակցիոն պատկերն ունի «X» տառի տեսքը։

Ֆրանկլինի ռենտգենագրերի հիման վրա (նկ. 1) Ուոթսոնն ու Քրիքն առաջարկեցին ԴՆԹ-ի կառուցվածքի հնարավոր մոդելը։ Այս աշխատանքի համար 1962 թ. Ջեյմս Ուոթսոնը, Ֆրենսիս Քրիկը և Մորիս Ուիլկինսը բժշկության բնագավառում արժանացան Նոբելյան մրցանակի։

ԴՆԹ-ի կառուցվածքի բացահայտումը թույլ տվեց հասկանալ ԴՆԹ-ի մի շարք գործառույթների բազմազան ասպեկտներ, որոնցից են. ինչպես է այն պատՃենվում և ինչպես է դրանում առկա տեղեկատվությունը օգտագործվում սպիտակուցներ սինթեզելու համար։ ԴՆԹ-ի մոլեկուլը կենդանի համակարգի ժառանգական ինֆորմացիայի կրողն է, պահպանողն ու փոխանցողը։ Բանն այն է, որ կենդանի օրգանիզմի ողջ գենետիկական ինֆորմացիան և կենդանի օրգանիզմների կառուցվածքը որոշվում են այս հսկա մոլեկուլի մոնոմերային օղակների հաջորդականությամբ։ Ընդհանուր առմամբ, ԴՆԹ մոլեկուլը ֆիզիկական յուրահատուկ համակարգ է, և նրա ֆիզիկական հատկությունների պարզաբանումը թույլ է տալիս հասկանալ կենդանի օրգանիզմում ԴՆԹ-ի կենսաբանական ֆունկցիաները և բացատրել պաթոլոգիական մի շարք պրոցեսների առաջացման մոլեկուլային մեխանիզմները։

ԳԼՈՒԽ 1. ԴՆԹ-Ի ԿԱՌՈՒՑՎԱԾՔՆ ՈՒ ԱՌԱՆՁՆԱՀԱՏԿՈՒԹՅՈՒՆՆԵՐԸ

1.1. ጉՆԹ-Ի ԿԱՌՈՒՑՎԱԾՔԸ։ ՊԱՐՈՒՅՐ-ԿԾԻԿ ԱՆՑՈՒՄԸ

ԴՆԹ մոլեկուլում ընթացող ֆիզիկական պրոցեսներից առանձնահատուկ տեղ է գրավում համեմատաբար լավ ուսումնասիրված պարույր-կծիկ անցման պրոցեսը, որի մասին սկսեցին խոսել դեռևս 1950-ական թվականների վերջում։

ԴՆԹ-ի պարույր-կծիկ անցում, դենատուրացիա կամ հալում են անվանում կոմպլեմենտար հիմնային զույգերի միջև գործող ջրածնային կապերի քանդումը, որի դեպքում պահպանվում են շաքարաֆոսֆատային հենքի կովալենտ կապերը։

Նշենք, որ ԴՆԹ-ի հալումը էապես տարբերվում է ֆիզիկայում ընդունված հալման երևույթից։ Մինչ այս երևույթի ուսումնասիրումը, նախ անդրադառնանք ԴՆԹ-ի կառուցվածքին, որը սխեմատիկորեն ներկայացված է նկ. 2-ում։



Նկ. 2. ԴՆԹ-ի կառուցվածքը.

ա) նուկլեոտիդային շղթայի հատված, բ) ԴՆԹ-ի մոլեկուլի մոնոմերի սխեմատիկ պատկերումը, որտեղ Ֆ-ն ֆոսֆորային թթվի մնացորդն է, Շ-ն՝ շաքարային օղակը, Հ-ն՝ ազոտական հիմքերից մեկը (թիմին, գուանին, ադենին, ցիտոզին):

ԴՆԹ-ի մոլեկուլը կարելի է համարել ոչ պարբերական միաչափ բյուրեղ, քանի որ ԴՆԹ մոլեկուլի տարրական բջիջը (զույգ ազոտային հիմքերը) փոխազդում է միայն երկու հարևան միավորների հետ։ ԴՆԹ-ի մոլեկուլը ոչ պարբերական է, քանի որ յուրաքանչյուր շղթա կազմված է չորս տեսակի տարրական միավորներից՝ նուկլեոտիդներից։ ԴՆԹ-ի նուկլեոտիդները կազմված են ազոտային հիմքից (ադենին, թիմին, գուանին, ցիտոզին), ածխաջրից (դեզօքսիոիբոզ) և ֆոսֆորական թթվի մնացորդից։

Կախված միջավայրի հարաբերական խոնավությունից, իոնական ուժից և նուկլեոտիդների հաջորդականությունից՝ ԴՆԹ մոլեկուլը կարող է գտնվել պարուրային տարբեր պարամետրերով բնութագրվող կրկնակի պարուրային կոնֆորմացիաներում։ Ներկայումս փորձնականորեն հայտնաբերված և ուսումնասիրված են ԴՆԹ-ի աջ (A, B, C, և այլն) և ձախ (Z, Z' և այլն) պարուրային ձևերը։ Յուրաքանչյուր շղթայի ներսում նուկլեոտիդների միջն գործում են ամուր կովալենտ կապեր, որոնք օժտված են մոտ 60 կկայ/մոլ էներգիայով։ Պոլինուկլեոտիդային շղթաները միմյանց միանում են ջրածնային կապերով։ Նշենք, որ ԴՆԹ մոլեկուլը in vivo պայմաններում գտնվում է B ձևում, որը բնութագրվում է հետևյալ պարամետրերով. մոյեկույի տրամագիծը $\simeq 20$ Å (1 Å = 10^{-10} մ), շղթայի երկայնքով հարևան զույգ հիմքերի հեռավորությունը` $3,4\pm0,2$ Å, մեկ գայարին համընկնում են $10,4\pm0,1$ գույգ ազոտային հիմքեր, որոնք, կախված նուկլեոտիդների hɯջորդականությունից և միջավայրի հատկություններից, միմյանց նկատմամբ թեքված են $\approx 36 \pm 4^{\circ}$ անկյունով։ Զույգ հիմքերը դասավորված են համարյա միմյանց զուգահեռ։ Ջերմային շարժման հետևանքով հիմքերը ամենաշատը կարող են շեղվել 3º-ով։ Գտնվելով պարուրային վիձակում` ԴՆԹ-ի զույգ ազոտային հիմքերը որոշակի հավանականությամբ կարող են բացվել ու փակվել։ ԴՆԹ-ի B ձևր շատ հաձախ կոչվում է ԴՆԹ-ի նատիվ կառուցվածք։ ԴՆԹ-ն նատիվ վիձակում է pH= 8 ÷5 տիրույթում։ pH-ի փոքրացումը կամ մեծացումը հանգեցնում է պարուրային կառուցվածքի քանդմանը։ ԴՆԹ-ի երկշղթա կառուցվածքի հիմքում ընկած են Չարգաֆի կանոնները, որոնց համաձայն՝ գուանինային հիմքերի քանակը հավասար է ցիտոզինային հիմքերի, իսկ ադենինային հիմքերինը` թիմինային հիմքերի քանակին։ Ընդ որում` ԴՆԹ-ի յուրաքանչյուր պոլինուկլեոտիդային շղթայի կմախք կազմված է

շաքարաֆոսֆատային հենքից, որին կովալենտ կապերով կապված են ազոտային հիմքերը։ Վերջիններս ուղղված են դեպի պարույրի առանցքը՝ շաքարաֆոսֆատային կմախքի նկատմամբ կազմելով գրեթե 90º անկյուն։ Ազոտային հիմքերը պարույրի ներսում դասավորված են սյունաձև իրար վրա, (A)ադենինի դիմաց միշտ գտնվում է (T)-թիմինը, (G) -գուանինի դիմաց՝ (C)-ցիտոզինը։ Նշենք, որ ադենինի և թիմինի միջև առաջանում է երկու ջրածնային կապ, իսկ գուանինի և ցիտոզինի միջև՝ երեք ջրածնային կապ։ ԴՆԹ-ի կրկնակի պարուրային կառուցվածքի կայունացման գործում մեծ դեր են կատարում կոմպլեմենտար զույգ ազոտային հիմքերի միջև առկա ջրածնային կապերը, ներմոլեկուլային և միջմոլեկուլային վանդերվալսյան ուժերը (հիդրոֆոբ և հիդրոֆիլ փոխազդեցության ուժերը)։ Այսպիսի միաչափ ոչ պարբերական բյուրեղի հատկություններն էապես տարբերվում են ցածրամոլեկուլային նյութերի առաջացրած բյուրեղային կառուցվածքի հատկություններից։ Ընդհանուր առմամբ, ԴՆԹ մոլեկուլը յուրահատուկ ֆիզիկական համակարգ է, և նրա ֆիզիկական հատկությունների պարզաբանումը թույլ է տալիս հասկանալ կենդանի օրգանիզմում ԴՆԹ-ի կենսաբանական ֆունկցիաները և բացատրել պաթոլոգիական մի շարք պրոցեսների առաջացման մոլեկուլային մեխանիզմները։ Ֆիզիկական ուսումնասիրությունները կարևոր են նաև ԴՆԹ-ի այնպիսի գենետիկական ֆունկցիաների հասկացման գործում, ինչպիսիք են գենետիկական ինֆորմացիայի պահպանումը, վերարտադրությունն ու իրականացումը։

ԴՆԹ-ի հալումը։ Այժմ անդրադառնանք ԴՆԹ-ի պարույրկծիկ անցման երևույթի ուսումնասիրությանը։

Այսպիսի ոչ կովալենտ փոխազդեցություննեը կայուն են

միայն չափավոր ջերմաստիձաններում։ Օրինակ՝ ԴՆԹ-ն, որը բաղկացած է 100 կրկնվող միավորից (զույգ հիմքերից) բաժանվում է առանձին երկու շղթաների ջերմաստիձանների 69-107 ℃ տիրույթում՝ կախված նուկլեոտիդային կազմից և միջավայրի բնութագրերից՝ լուծույթի իոնական ուժից և pH-ից։

Կրկնակի պարուրային կառուցվածքի խախտում կարող են առաջացնել լուծույթի ջերմաստիձանի բարձրացումը, իոնական ուժի փոփոխությունը, քիմիական նյութերի՝ դենատուրատների ազդեցությունը և մի շարք այլ գործոններ։ Եվ այսպես, ԴՆԹ-ի դենատուրացիայի պրոցեսում ազոտային հիմքերի հաջորդականությունը (առաջնային կառուցվածքը) շղթայում չի փոխվում (քիմիական կապերը չեն խզվում), քանդվում են երկու շղթաների միջև գործող ներմոլեկուլային ջրածնային կապերը։ ԴՆԹ մոլեկուլի միթելանի շղթաները, որոնք առաջանում են դենատուրացիայի հետևանքով, ձկուն պոլիմերային շղթաներ են։ Այդպիսի շղթաները նկարագրվում են ազատ համակցված շղթայի մոդելով։ Նրանց ծայրերի միջև եղած հեռավորությունների բաշխումը Գաուսյան է, այդ պատմառով այդպիսի շղթաները կոչվում են գաուսյան կամ վիձակագրական կծիկ։ Դենատուրացված կամ կծիկանման վիձակում ԴՆԹ մոլեկուլում հարևան ազոտային հիմքերի հեռավորությունը կազմում է 6,8 Å, որը 2 անգամ ավելի մեծ է, քան կրկնակի պարույը վիձակում։

ԴՆԹ մոլեկուլի հալումը կարելի է ուսումնասիրել ֆիզիկական տարբեր մեթոդներով՝ սպեկտրասկոպական, կալորիմետրական, հիդրոդինամիկական և այլն։ Ուսումնասիրության համեմատաբար պարզ մեթոդ է ԴՆԹ մոլեկուլների լուծույթի լույսի կլանման չափումը սպեկտրի ուլտրամանուշակագույն տիրույթում՝ կախված ջերմաստիձանից։ Պարույրկծիկ անցման հետևանքով առաջացած միթելանի ԴՆԹ-ն ձկուն պոլիմերային շղթա է։ Դենատուրացված կամ կծիկանման վիձակում ԴՆԹ մոլեկուլում հարևան ազոտային հիմքերի հեռավորությունը կազմում է 6,8 Å, որը 2 անգամ ավելի մեծ է, քան կրկնակի պարույր վիձակում։ Որոշակի պայմաններում ԴՆԹ մոլեկուլի հալումը հակադարձելի է։ Ջերմաստիձանի նվազման հետ շղթաների կոմպլեմենտար հիմքերը միանում են ջրածնային կապերով՝ առաջացնելով կրկնակի պարուրային տեղամասեր (ռենատուրացիա)։ Հետևաբար ընդհանրացնելով շարադրվածը՝ կարելի է պնդել, որ ԴՆԹ մոլեկուլի դենատուրացիան կարգավորված պարույր (բյուրեղային) վիձակից անցում է չկարգավորված կծիկ (հեղուկ) վիձակի։

Պարուրային վիձակում ԴՆԹ-ի մոլեկուլն օժտված է բավականին կոշտ կառուցվածքով։ Սակայն կրկնակի պարույրի որոշ Ճկունություն, այնուամենայնիվ, պահպանվում է։ Երկթելանի ԴՆԹ-ն իրենից ներկայացնում է կծիկ՝ անոմալ մեծ ստատիստիկ սեզմենտով՝ ≈ 300 հիմնային զույգ։ ՎիՃակագրական սեգմենտի այսպիսի արժեքը պայմանավորված է պարույրի անընդհատ Ճկունությամբ, այլ ոչ թե պարուրային կառուցվածքի լոկալ՝ տեղային խախտումներով, այսինքն՝ ԴՆԹ-ն որդանման (պերսիստենտային), այլ ոչ թե զիգզագանման շղթա է։ Այսպիսով, պարույը-կծիկ անցումը վիձակագրական կծիկի էներգիապես շահավետ բարձր կարգավորված պարուրային, «բյուրեղական» վիճակից դարձելի անցումն է անկարգավորված, «հեղուկ» վիձակին։ Ուշագրավ է նաև այն հանգամանքը, որ կծիկանման վիճակում գտնվող շղթայում հիմքերի հաջորդականությունը նույնն է, ինչ- որ պարույրում, քանի որ ԴՆԹ-ի հայման ժամանակ խզվում են միայն թույլ միջմոլեկույային ուժերը, իսկ կովալենտ կապերը շաքարաֆոսֆատային շղթաների ներսում մնում են անփոփոխ։ Նկար 3-ում ԴՆԹ-ի հայման սխեմատիկ պատկերն է, որտեղ ԴՆԹ-ի բնական (նատիվ) վիճակը պատկերված է ա կետում։ Ուղղահայաց գծերը շաքարաֆոսֆատային մնացորդներն են, հորիզոնականները՝ զույգ ազոտային հիմքերը, կապված են ջրածնային կապերով, որոնք, ջերմաստիձանի բարձրացմանը զուգրնթաց, սկսում են խզվել։ Քանի որ ադենին-թիմին զույգերի միջև գործում են երկու ջրածնային կապեր, ուստի նրանց ջերմակայունությունն ավելի փոքր է, քան գուանին-ցիտոզին զույգերինը, որտեղ առկա են երեք ջրածնային կապեր, հետևաբար նախ քանդվում են AT-հարուստ տեղամասերը՝ երկպարույրի վրա առաջացնելով հայված տեղամասեր (նկ. 3բ), այնուհետև ավելի բարձր ջերմաստիձաններում սկսվում են քանդվել GC-հարուստ տեղամասերը, իսկ հայման պրոցեսի վերջում խզվում են ԴՆԹ-ի երկպարույրը կայունացնող բոլոր ջրածնային կապերը և տեղի է ունենում պարույրաձև կառուցվածքի լրիվ քանդում առանձին կծիկների առաջացմամբ (նկ. 3 գ)։



ա) բ) գ) Նկ. 3. ԴՆԹ-ի մոլեկուլի հալման սիսեմատիկ պատկեր

1.2. ԴՆԹ-Ի ՊԱՐՈՒՅՐ-ԿԾԻԿ ԱՆՑՄԱՆ ՊՐՈՑԵՍԻ ՆԿԱՐԱԳՐՈՒԹՅՈՒՆԸ (ԻԶԻՆԳԻ ՄՈԴԵԼ)

ԴՆԹ-ի հալման պրոցեսի նկարագրությունը սկսենք հալման պարզագույն մոդելից (Իզինգի մոդել), որը բացատրում է այս պրոցեսի կարևոր հատկությունները։ Ենթադրենք, որ AT և GC զույգերի քանդման համար պահանջվում է միևնույն էներգիան (իրականում դա այդպես չէ)։ Անցումային շրջանում, ինչպես երևում է նկ. 3 բ-ից, ԴՆԹ-ի մոլեկուլը բաղկացած է իրար հաջորդող քանդված և նատիվ տեղամասերից, որոնք պահպանում են առաջնային կառուցվածքը։

Քանդված զույգերի թիվը նշանակենք N₁-ով, իսկ կապված զույգերի թիվը՝ N₂։ Համապատասխանաբար քանդված զույգերի ազատ էներգիան և կապված զույգերի ազատ էներգիան նշանակենք F₁ և F₂։

m զույգերից բաղկացած քանդված տեղամասերի առաջացումը պայմանավորված է m հատ ջրածնային կապերի և m+1 հատ ազոտական հիմքերի միջև միջմոլեկուլային կապերի խզմամբ։ Հալման ընթացքում առաջացած հալված և նատիվ հատվածների նոր սահմանների առկայությունը համակարգի ազատ էներգիայի բանաձևում արտահայտվում է ազատ էներգիայի լրացուցիչ գումարելիով։ Այդ էներգիան նշանակենք F-ով, իսկ հալված տեղամասերի թիվը` n-ով։ Ուստի, հալվող ԴՆԹ-ի մոլեկուլի ազատ էներգիան կունենա հետևյալ տեսքը՝

$$\mathbf{N}_{1}\mathbf{F}_{1} + \mathbf{N}_{2}\mathbf{F}_{2} + \mathbf{n}\mathbf{F}_{2},$$

որտեղ N₁, N₂ և ո արժեքները սահմանում են որոշակի մակրոսկոպական վիձակ։ Տրված N₁, N₂ և ո-ին համապատասխան միկրովիձակների թիվը հավասար է այն հնարավորությունների թվին, որոնցով *N*⁷ տարրերը կարող են տեղակայվել ո խմբերում և միաժամանակ *N*² տարրերը ո խմբերում, ինչը հավասար է W=W¹W², որտեղ՝

$$W_1 = \frac{(N_1 - 1)!}{(n - 1)!(N_1 - n)!}$$
$$W_2 = \frac{(N_2 - 1)!}{(n - 1)!(N_2 - n)!}$$

Նշենք, որ մոնոմերների ընդհանուր քանակը ԴՆԹ-ի մոլեկուլներում՝ $N = N_1 + N_2$, բավականին մեծ է ($N > 10^7$), իսկ $N \rightarrow \infty$ դեպքում, ընդունելով N-1 ≈ N W-ի համար, կարելի է գրել.

$$W = \frac{N_1! N_2!}{(n!)^2 (N_2 - n)! (N_1 - n)!}$$
(1)

Այսպիսով, մեր համակարգի ազատ էներգիան կունենա հետևյալ տեսքը՝

 $F = N_1F_1 + N_2F_2 + nF - RTlnW = N_1F_1 + N_2F_2 + nF - RTlnW:$

(1) բանաձևից W-ն սկզբում լոգարիթմելով, այնուհետև, կիրառելով Ստիռլինգի մոտավորման բանաձևը տվյալ համակարգի ազատ էներգիայի համար, կստանանք հետևյալ արտահայտությունը՝

$$\begin{split} F &= N_1 F_1 + N_2 F_2 + n F - R T [N_1 \ln N_1 - n \ln n - (N_1 - n) \ln (N_1 - n) + N_2 \ln N_2 - n \ln n - (N_2 - n) \ln (N_2 - n)] \end{split}$$

Հիշեցնենք, որ, ըստ Ստիռլինգի մոտարկման բանաձևի, երբ N>>1 ունենք

$$N!=(N/e)^{N} \Rightarrow lnN! \approx N \cdot (lnN-1):$$

Այժմ օգտվելով ազատ էներգիայի (2) արտահայտությունից՝ որոշենք հալումը նկարագրող պարամետրը, այսինքն՝ մոնոմերների այն քանակը, որը տվյալ ջերմաստիձանում գտնվում է պարուրային (բյուրեղարին) վիձակում կամ, այսպես կոչված, պարուրականության աստիձանը (*θ*) ։

Նշանակելով՝

$$\theta = \frac{N_2}{N} \tag{3}$$

ազատ էներգիայի մինիմումի պայմանից՝ $\left(\frac{\partial F}{\partial n}\right)_{N_1N_2} = 0$, կստանանք՝

$$\left(\frac{N_1}{n} - 1\right)\left(\frac{N_2}{n} - 1\right) = \frac{1}{\sigma} \quad , \tag{4}$$

npտեη σ = exp{ $-\frac{F}{RT}$ }, huų $\left(\frac{\partial F}{\partial N_1}\right)_n = 0$ պայմանից ստանում

ենք

$$\frac{\left(1-\frac{n}{N_2}\right)}{\left(1-\frac{n}{N_1}\right)} = S \quad , \tag{5}$$

որտեղ կատարել ենք համապատասխան նշանակում՝ $S = \exp\{\frac{F_1 - F_2}{RT}\}$:

Ստացված բանաձևերը տալիս են *N_i, N₂,* և *n*-ի կախվածությունը *S*-ից, որը իր հերթին կախված է ջերմաստիձանից։ Միավորելով (4) և (5) բանաձևերը և նկատի ունենալով θ-ի համար (3) նշանակումը՝ ստանում ենք

$$\frac{1-2\theta}{\sqrt{\theta(1-\theta)}} = \frac{1}{\sqrt{\sigma}} \frac{1-S}{\sqrt{S}} :$$
(6)

Եթե կառուցենք 1-*θ*- ի («կծիկ» վիճակում գտնվող տեղամասերի քանակի) կախվածությունը *T*ջերմաստիճանից, ապա կստանանք նկ. 4-ում պատկերված գրաֆիկը։



Նկ. 4. ԴՆԹ-ի հալման պրոցեսի սխեմատիկ պատկերումը (ш) և տեսական կորը (p)

Այս սիմետրիկ «*S*» տեսք ունեցող հալման կորը բնութագրվում է երկու պարամետրերով՝ հալման ջերմաստիձանով - T_m (որի դեպքում ԴՆԹ-ի մոնոմերային միավորների 50 %-ը քանդված են) և հալման ինտերվալ - ΔT , որը որոշվում է (7) բանաձևով՝ ելնելով նկ. 3-ից.

$$\Delta T = \frac{1}{\left(\frac{d\Theta}{dT}\right)_{\max}}$$
(7)

Фորձենք գնահատել այս երկու մեծությունները՝ $T_{\rm m}$ և ΔT -ն։ Նախ որոշենք $T_{\rm m}$ -ը։ Եթե միջհարթությունային և ջրածնային կապերի խզումով պայմանավորված ջերմությունը՝ հալման էնթալպիան, նշանակենք ΔH , իսկ էնտրոպիայի փոփոխությունը՝ ΔS , որը հիմնականում պայմանավորված է պարուրային վիձակից հալված վիձակին նուկլեոտիդային զույգի ազատության աստիձանի մեծացմամբ, ապա կարելի է գրել՝

$$F_1 - F_2 = \Delta H - T\Delta S:$$
(8)

Հալման ջերմաստիճանը որոշվում է $\Delta F=0$ պայմանից, որից ստացվում է՝

$$T_m = \frac{\Delta H}{\Delta S} \quad (9)$$

Հաշվի առնելով (7) և (8) բանաձևերը՝ ստանում ենք

$$\Delta T = 4\sqrt{\sigma} \frac{RT_m^2}{\Delta H}.$$
 (10)

Ինչպես երևում է ստացված բանաձևից, ΔT հալման միջակայքը էականորեն կախված է σ մեծությունից, որը կոչվում է կոոպերատիվության պարամետր։ Որքան մեծ է *F*-ը, այսինքն՝ մեծ է ստեկինգ փոխազդեցությունը, այնքան փոքր է σ մեծությունը և հակառակը։ Քանի որ միաչափ համակրգերում առաջին կարգի փուլային անցում տեղի չի ունենում, ապա երբ $\sigma \rightarrow 0$, ΔT չի ձգտում զրոյի։ Ի տարբերություն բյուրեղների հալմանը պարույր-կծիկ անցումը առաջին կարգի փուլային անցում չէ։ Այպիսով, հալման փորձարարական կորը կարելի է բնութագրել երկու պարամետրերով՝ T_m (9) և ΔT (10), որոնք անմիջականորեն բնութագրում են ԴՆԹ-ի ներմոլեկուլային փոփոխությունները։ Նշենք, որ այս տեսությունը կիրառելի է հոմոպոլիմերների համար, այսինքն՝ այնպիսի ԴՆԹ-ի, որը բաղկացած է միայն AT- կամ GC- հիմնային զույգերից։ Եթե ունենք նման հոմոպոլիմեր, ապա կարող ենք գնահատել ինչպես T_m -ը և ΔT-ն, այնպես էլ Δ*H*-ն և σ-ն։ Համապատասխանաբար ATպարունակող պոլիմերի դեպքում T_m = 67 °C, իսկ GC-ի դեպքում՝ T_m=107 °C, հալման էնթալպիան՝ ΔH= 7÷9 կկալ/մոլ, իսկ σ = 10⁻⁵, սրանով է պայմանավորված ΔT –ի շատ փոքր լինելու փաստը (մոտ 0.5 °C)։



Նկ. 5. Տարբեր ԴՆԹ-ների հալման ջերմաստիճանի կապը GC- պարունակությունից

Բնական ԴնԹ-ների դեպքում հալման միջակայքը ավելի մեծ է՝ $\Delta T = 3 \div 10$ °C, իսկ հալման ջերմաստիձանն ընկած է 67 °C

< T_m < 107 ºC տիրույթում։ Բնության մեջ հանդիպող ԴՆԹ-ները իրարից շատ են տարբերվում AT- և GC- զույգերի հարաբերական պարունակությամբ։ Տարբեր օրգանիզմներից անջատված և նուկլեոտիդների բաղադրությամբ իրարից տարբերվող ԴՆԹ-ների ջերմակայունությունը գծայնորեն աձում է՝ կախված նրանցում GC- զույգերի կոնցենտրացիայից։ Այդ կախվածությունը բերված է նկար 5-ում, որտեղ X_{GC}-ն GC- զույգերի հարաբերական կոնցենտրացիան է՝

$$X_{GC} = (G+C)/(A+T+G+C):$$

Ինչպես երևում է բերված գրաֆիկից, T_m–ի կախվածությունը X_{GC}-ից խիստ գծային է և տրվում է հետևյալ բանաձևով.

$$T_m = T_{AT} + X_{GC} (T_{GC} - T_{AT}), \qquad (11)$$

որտեղ՝ T_{AT} և T_{GC} – համապատասխանաբար միան AT- և միայն GC- զույգ հիմքերից բաղկացած պոլինուկլեոտիդների հալման ջերմաստիձաններն են։

ԴՆԹ-ի հալման ջերմաստիձանը զգալիորեն կախված է նաև միջավայրի հատկություններից, որում լուծված են մոլեկուլները։ Մասնավորապես, հալման պարամետրերը էապես կախված են լուծույթի իոնական ուժից և pH-ից։ Դիտարկենք դրանց ազդեցությունները։

1.3.1. ԼՈՒԾՈՒՅԹԻ ԻՈՆԱԿԱՆ ՈՒԺ։ ԴՐԱ ԱԶԴԵՑՈՒԹՅՈՒՆԸ ՀԱԼՄԱՆ ՊՐՈՑԵՍԻ ՎՐԱ

Իոնական ուժը լուծույթում իոնների կոնցենտրացիայի չափն է և կարևոր պարամետր է՝ լիցքավորված մոլեկուլների միջև էլեկտրաստատիկ փոխազդեցությունները որոշելու համար։ Այն հաշվարկվում է՝ գումարելով յուրաքանչյուր իոնի կոնցենտրացիայի՝ C_i, և լիցքի քառակուսու՝ Z_i², արտադրյալներով.

$$\mu = \frac{1}{2} \sum c_i z_i^2$$

Իոնների քանակի ցանկացած փոփոխություն ազդում է լուծույթում լիցքավորված մոլեկուլների միջև էլեկտրաստատիկ փոխազդեցությունների վրա, իսկ քանի որ ԴՆԹ-ի մոլեկուլը բացասական լիցքավորված հսկա մակրոմոլեկուլ է, ուստի այդ պարամետրի կարևորությունը առավել քան մեծ է։

Ինչպես գիտենք ԴՆԹ-ի ֆոսֆատային խմբերը լիցքավորված են բացասական, որոնց միջև գործում են էլեկտրաստատիկ վանողական ուժեր։ ԴՆԹ-ի մոլեկուլը ապակայունացնող այդ ուժերը կոմպենսացվում են հարևան շղթաների միջև գործող միջմոլեկուլային ուժերով և ազոտական հիմքերի միջև առկա ջրածնային կապերով։ Ֆոսֆատային խմբերի միջև վանողությունը կարելի է փոքրացնել՝ մեծացնելով լուծույթում որական լիզքավորված իոնների՝ կատիոնների, կոնցենտրացիան։ Կատիոնների առկայությունը զգալի փոքրացնում է վանողական ուժերի ազդեցության շառավիղը (տե՛ս Դեբայ-Հյուկկելի տեսությունը [3])։ Ուստի բացասական լիցքավորված ֆոսֆատային խմբերը դրական իոններով բավարար էկրանավորման դեպքում ԴՆԹ-ի կրկնակի պարույրը կայունանում է, որը բերում է լուծույթում իոնական ուժի մեծացմանը զուգընթաց հալման ջերմաստիձանի բարձրացմանը։ Փորձի միջոցով ստացվել է լուծույթում Na+ իոնների կոնցենտրացիայից հալման ջերմաստիձանի կախվածության հետևյալ էմպիրիկ բանաձևր, որը ձիշտ է լուծույթի չեզոք pH-ների և Na⁺ իոնների կոնցենտրացիայի 2*10-2M<[Na+]<1 M տիրույթում փոփոխման դեպքում.

$$T_m = 176 - (2.6 - X_{GC})(36 - 7.04lg[Na^+]),$$
 (12)

որտեղ T_m-ը հալման ջերմաստիձանն է, X_{GC} -ն՝ GC զույգ հիմքերի հարաբերական կոնցենտրացիան, $[Na^+]$ -ը՝ նատրիումի իոնների կոնցենտրացիան։ Na⁺ իոնների կոնցենտրացիայի համեմատաբար ավելի փոքր արժեքների դեպքում 10⁻³M< $[Na^+]$ < 2*10⁻²M տիրույթում հալման ջերմաստիձանը որոշվում է հետևյալ էմպիրիկ բանաձևով՝

$$T_{m} = 82,1 + X_{GC} (40 - 1.4 lg[Na^{+}]) + 17.3 lg[Na^{+}]:$$
(13)

Իոնական ուժը շատ կարևոր է կենսաբանական այնպիսի գործընթացներում, ինչպիսիք են՝ ԴՆԹ-ի հիբրիդացումը և սպիտակուց-ԴՆԹ փոխազդեցությունները։ Այն կարող է ազդել ԴՆԹ-ի դուպլեքսների կայունության, ԴՆԹ-ի հետ սպիտակուցների միացման և կենսաբանական մոլեկուլների ընդհանուր կառուցվածքի ու ֆունկցիայի վրա։

1.3.2. ԼՈՒԾՈՒՅԹԻ PH։ ԴՐԱ ԱԶԴԵՑՈՒԹՅՈՒՆԸ ՀԱԼՄԱՆ ՊՐՈՑԵՍԻ ՎՐԱ

Ջրի մոլեկուլների ինքնաբերաբար դիսոցման (իոնացման) հետևանքով մաքուր ջրում առաջանում են ջրածնի իոններ։ Այս գործընթացը կոչվում է ջրի **ինքնաիոնացում**.

 $H_2O \Leftrightarrow H^++OH^{-:}$

Ինչպես ցույց է տրված հավասարման մեջ, դիսոցումը հավասար քանակով ջրածնի (H+) իոններ և հիդրօքսիդ (OH-) իոններ է առաջացնում։ Մաքուր ջրում դիսոցման հետևանքով առաջացած ջրածնի իոնների կոնցենտրացիան հավասար է 1 \times 10⁻⁷ M (մոլ յուրաքանչյուր լիտրում)։ Լուծույթները, ըստ ջրածնի իոնների կոնցենտրացիայի, լինում են թթվային և հիմնային։ Թթվային լուծույթներն ունեն ավելի բարձր H⁺ կոնցենտրացիա քան ջուրը, մինչդեռ հիմնային (ալկալիական) լուծույթներն ունեն ավելի ցածր H⁺ կոնցենտրացիա։ Որպես կանոն՝ լուծույթում ջրածնի իոնների կոնցենտրացիան արտահայտվում է pH-ով։ **pH**-ը հաշվում են լուծույթում որպես ջրածնի իոնների կոնցենտրացիայի բացասական լոգարիթմ.

$pH=-lg[H^+]:$

[H+]-ը H+իոնների կոնցենտրացիան է։ Մաքուր ջրի համար ստացվում է՝

$$pH = -lg[10^{-7}] = 7,$$

որը հայտնի է որպես չեզոք pH: Մարդու օրգանիզմում և΄ արյունը, և՛ ցիտոսոլը բջիջների ներսում ունեն չեզոքին մոտ pH արժեքներ:

H⁺-ի կոնցենտրացիան չեզոքից շեղվում է, երբ ջրային լուծույթին թթու կամ հիմք է ավելացվում։ *Թթուներն* այն էլեկտրոլիտներն են, որոնց դիսոցումից ստացվում են ջրածնի կատիոններ ու թթվային մնացորդի անիոններ, որոնց հետևանքով մեծանում է լուծույթում ջրածնի իոնների (H+) կոնցենտրացիան։

Հիմքը, հակառակ դրան, բարձրացնում է pH-ը՝ տրամադրելով հիդրօքսիդ (OH-)։

Լուծույթի թH-ը կարող է զգալիորեն ազդել ԴՆԹ-ի հալման ջերմաստիձանի՝ Tm-ի վրա։ Այս ազդեցությունը հիմնականում պայմանավորված է pH-ի դերով ԴՆԹ-ի մոլեկուլի ազոտական հիմքերի և ֆոսֆատային մնացորդի պրոտոնացմամբ (H⁺ իոնների ձեռքբերում) կամ դեպրոտոնացմամբ (H⁺ իոնների կորուստ)։

Թթվային միջավայրում (pH < 5) պրոտոնների կոնցենտրացիան լուծույթում բարձր է և ԴՆԹ-ի կրկնակի պարույրը դառնում է ավելի անկայուն, քանի որ պրոտոնների ավելցուկը կարող է խաթարել զույգ հիմքերի միջև ջրածնային կապերը։ Արդյունքում Tm-ը զգալիորեն նվազում է։

Բարձր հիմնային միջավայրում (pH > 9) հիդրօքսիդ իոնների կոնցենտրացիան բարձր է, դա ևս կարող է խաթարել ԴՆԹ-ում ջրածնային կապերը՝ ԴՆԹ-ի կրկնակի պարույրը դարձնելով ավելի անկայուն։ Հետնաբար Tm-ը նվազում է նաև հիմնային միջավայրերում։

ԴՆԹ-ն առավել կայուն է միջավայրի չեզոք pH-ի դեպքում (այն մնում է հաստատուն pH-ի 5÷9 արժեքների դեպքում)։ pH-ի այս արժեքների դեպքում ջրածնային կապերը ազոտական հիմքերի միջև հնարավորինս կայուն են։

Այսպիսով, ԴՆԹ-ի հալման ջերմաստիձանը կախված է լուծույթի pH-ից և այն զգալիորեն փոքրանում է pH5-ից փոքր և pH9-ից բարձր արժեքների դեպքում։

Պետք է նշել, որ ԴՆԹ-ի մոլեկուլի ուսումնասիրությունները կատարվում են հիմնականում միջավայրի այնպիսի պայմաններում, որոնք հնարավորինս մոտ են ֆիզիոլոգիական պայմաններին։ Իսկ ստանդարտ ասելով՝ պետք է հասկանալ այնպիսի պայմաններ, որոնք համապատասխանում են բջջի ներսի պայմաններին, դրանք են` pH 7, [Na+] = 0.195 M (0.9%)։

ԴՆԹ-ի կենսագործունեության հիմքում ընկած է նրա մոլեկուլի կառուցվածքի փոփոխությունը ներբջջային և արտաքին ազդակների ազդեցության տակ։ Համընդհանուր ձանաչում է ստացել ԴՆԹ-ի մոլեկուլի կազմակերպման և վարքի «ջրային» կոնցեպցիան։ Այս կոնցեպցիայի հիմքում ընկած է հսկայական փորձնական նյութ, ինչի հիման վրա կարելի է պնդել, որ մոլեկուլի հիդրատային թաղանթում հենց ջրի վիձակով է որոշվում ԴՆԹ-ի մոլեկուլի պարուրային կոնֆորմացիաների կայունությունը, ինչպես նաև ԴՆԹ – ջուր համակարգի էլեկտրական, դիէլեկտրիկ և ջերմադինամիկական հատկությունները։ ԴՆԹ – ջուր համակարգը պայմանականորեն կարելի է բաժանել երկու տիպի փոխազդեցությունների.

1. փոխազդեցություններ ԴՆԹ-ի մոլեկուլների հիդրատաիոնական թաղանթում, այսինքն՝ ջրի «ազատ» և «կապված» մոլեկուլների միջև,

2. փոխազդեցություններ ԴՆԹ-ի մոլեկուլների հիդրատաիոնական թաղանթի և նուկլեոտիդային կմախքի հետ։

Կենսաբանական համակարգերի գենետիկական ապարատի էֆեկտիվ գործունեությունը հիմնականում պայմանավորված է ԴՆԹ-ի մոլեկուլի կոնֆորմացիոն հնարավորությունների բազմազանությամբ և առանձնահատկություններով։ Կառուցվածքային` կոնֆորմացիոն անցումների հնարավորությունը ԴՆԹ-ի շղթայի երկայնքով պայմանավորված է ինչպես միջավայրի պայմաններով (pH, իոնական ուժ, նուկլեոտիդային կազմ, մետաղական իոններ կամ այլ լիգանդներ), այնպես էլ հեռազդեցությամբ և ԴՆԹ-ի մոլեկուլի շուրջն առկա ջրային շերտի կամ թաղանթի` հիդրատացման փոփոխություններով։ Ինչպես հայտնի է, ԴՆԹ-ի մոլեկուլը, որը պոլիէլեկտրոլիտ է, հիդրատացված է խիստ, բայց անհավասարաչափ։ Նրա շուրջը տարբերում են ջրի մոլեկուլների երկու շերտեր՝ առաջնային և երկրորդային հիդրատային թաղանթներ և ազատ ջուր։ ԴՆԹ-ի հիդրատացման աստիձանը որոշակի նշանակություն ունի նրա կոնֆորմացիայի համար։ Մակրոմոլեկուլի հիդրատացիան չափը որոշում են H պարամետրով, որը ԴՆԹ-ի համար 1 մոլ նուկլեոտիդներին բաժին ընկնող ջրի մոլերի թիվն է։ ԴՆԹ-ի երկրորդային կառուցվածքը սերտորեն կապված է H պարամետրի հետ, որն իր հերթին անմիջականորեն կապված է լուծույթում աղի կոնցենտրացիային հակադարձ համեմատական փոխվող ջրի ակտիվության հետ՝ a_w։

Առաջնային հիդրատային թաղանթն իր կառուցվածքով տարբերվում է սովորական ջրից։ Ներքին թաղանթն անթափանց է կատիոնների համար և չի «սառչում», այսինքն՝ սառցանման կառուցվածքներ չի առաջացնում 0°C-ից ցածր ջերմաստիձաններում։ Սառույցի կարգավորված կլաստերային կառուցվածքը, ըստ երևույթին, շատ կոշտ է և չի կարող ձևավորվել նուկլեինական թթուների նման կոշտ մակերևույթների շուրջը։ Սառույցի կառուցվածքին բնորոշ աղավաղված վեցանկյուն օղակների փոխարեն հիդրատային թաղանթը, ըստ երևույթին, առաջացնում է ավելի քիչ կամ շատ կարգավորված կառուցվածքներ։

Երկրորդային հիդրատային թաղանթը չի տարբերվում սովորական ջրից ո՛չ ըստ իոնների թափանցելիության, ո՛չ էլ սառցանման կառուցվածք առաջացնելու հատկությամբ։ Սակայն կառուցվածքային առումով այն, այնուամենայնիվ, տարբերվում է ԴՆԹ-ի պոլիէլեկտրոլիտ մոլեկուլից հեռու գտնվող ջրից։

ԳԼՈՒԽ 2. ԴՆԹ-Ի ՀԱԼՄԱՆ ՓՈՐՁԱՐԱՐԱԿԱՆ ՀԵՏԱԶՈՏՄԱՆ ՄԵԹՈԴՆԵՐԸ

Պարույր-կծիկ անցումը կարելի է դիտարկել տարբեր մեթոդներով. օպտիկական (կլանում, օպտիկական ակտիվություն), կալորիմետրիկ, հիդրադինամիկ և այլն։ Անդրադառնանք դրանցից մի քանիսին

2.1. ՈՒԼՏՐԱՄԱՆՈՒՇԱԿԱԳՈՒՅՆ ԿԼԱՆՄԱՆ ՍՊԵԿՏՐԱՍԿՈՊԻԿ ՄԵԹՈԴ

Բավականին մեծ կիրառություն է գտել ուլտրամանուշակագույն (ՈւՄ) տիրույթում ԴՆԹ-ի կլանման կորի չափման մեթոդը՝ λ=260 նմ ալիքի երկարության դեպքում, որտեղ դիտվում է ԴՆԹ-ի կլանման մաքսիմումը։ Համաձայն կլանող միջավայրով անցման ժամանակ զուգահեռ մոնոքրոմատիկ լույսի ինտենսիվության նվազման օրենքի՝ Լամբերտ-Բուգեր-Բերի օրենքի նմուշի վրա ընկնող Ι₀ և դուրս եկող I լույսի ինտենսիվությունների միջև կապը որոշվում է հետևյալ բանաձևով.

$$I = I_0 e^{-\alpha cd}$$

Այստեղ c-ն լուծույթի կոնցենտրացիան է [մոլ կամ մոլ/լ], d-ն կլանող լուծույթի շերտի հաստությունն է կամ օպտիկական ձանապարհը [սմ], ε-ը՝ կլանման մոլային գործակիցը [մոլ-¹•սմ-¹ կամ լ•մոլ-¹•սմ-¹]:

A = ln(Io/I) մեծությունը կոչվում է օպտիկական խտություն, որը բնութագրում է կլանման չափը և որոշվում է $A = \varepsilon cd$ բանաձևով։ Այսպիսով, կլանման սպեկտրների միջոցով կարելի է որոշել նուկլեինաթթուների կոնցենտրացիան։

Պետք է նշել, որ օպտիկական խտության գծային կախվածությունը պահպանվում է նուկլեինաթթուների բավականին փոքր կոնցենտրացիաների դեպքում (նոսր լուծույթներ)։ Նոսր համարվում են այն լուծույթները, որոնցում նուկլեինաթթուների միջև միջմոլեկուլային փոխազդեցությունները կարելի է անտեսել։ Այս դեպքում այդ լուծույթների կլանումը՝ օպտիկական խտության արժեքը, չի գերազանցում երեքը։

ԴՆԹ-ի կլանման էլեկտրոնային սպեկտրը նշված ՈւՄ տիրույթում պայմանավորված է պուրինային և պիրիմիդինային հիմքերի կլանումով։ Ազոտական հիմքերի կլանումը պայմանավորված է էլեկտրոնային $\pi \rightarrow \pi^*$ և ո $\rightarrow \pi^*$ անցումներով։ Կենսապոլիմերների կլանման սպեկտրները կախված են նրանց երկրորդային կառուցվածքից։ Պարույր-կծիկ անցման ժամանակ տեղի է ունենում կլանման չափի փոփոխություն և մաքսիմումը (λ = 260նմ) ա*ձ*ում է։ Այս երևույթը կոչվում է հիպերքրոմ էֆեկտ և այն պայմանավորված է ազոտական հիմքերի միջև ստեկինգ փոխազդեցության վերացմամբ։

Նկար 6-ում ներկայացված են ԴՆԹ-ի կլանման սպեկտրերը պարույր և կծիկ վիձակներում։ Ինչպես երևում է նկարից, ԴՆԹ-ի հալումը ուղեկցվում է կլանման սպեկտրի ինտենսիվության աձով (հիպերքրոմային էֆեկտ)։



Նկ. 6. ԴՆԹ-ի կլանման կորերը. ա) նատիվ վիձակում, բ) դենատուրացված վիձակում

Եթե A_i-ով նշանակենք ԴՆԹ-ի լուծույթի օպտիկական խտությունը տվյալ ջերմաստիձանում, իսկ A_{min} և A_{max} - ով համապատասխանաբար օպտիկական խտությունները ամբողջությամբ պարույր և ամբողջությամբ կծիկ վիձակներում, ապա

$$\frac{A_i - A_{\min}}{A_{\max} - A_{\min}} = 1 - \theta, \qquad (14)$$

որտեղ Ө-ն պարույրականության աստիձանն է, որը ցույց է տալիս այն մոնոմերային միավորների թիվը, որոնք գտնվում են պարույր վիձակում, իսկ 1-Օ-ն՝ այն մոնոմերային միավորների թիվը, որոնք գտնվում են կծիկանման վիձակում։

Հալման կորը բնութագրվում է 2 պարամետրով. 1) հալ-

ման ջերմաստիձանով (T_m), որի դեպքում մոնոմերային միավորների կեսը գտնվում է պարուրային վիձակում, իսկ մյուս կեսը՝ կծիկանման և 2) հալման միջակայքով (ΔT)։ Այդ ջերմաստիձանը համապատասխանում է հալման կորի շրջման կետի ջերմաստիձանին, ինչպես ցույց է տրված նկար 6ա-ում։ Հալման միջակայքը որոշվում է այն ջերմաստիձանի տարբերությամբ, որտեղ հալման կորի շրջման կետում տարված շոշափողը հատվում է θ = 0 և θ = 1 ուղիղների հետ`

$$\Delta \mathbf{T} = \left(\frac{\partial \theta}{\partial \mathbf{T}}\right)_{T=T_m}^{-1} :$$

Միայն AT- զույգ հիմքերից կազմված poly(dAT)² պոլինուկլեոտիդի հալման ջերմաստիձանը՝ $T_m = 66$ °C, իսկ միայն GC- զույգ հիմքերից կազմված poly(dGC)² պոլինուկլեոտիդի հալման ջերմաստիձանը՝ $T_m = 85$ °C: Բնական ԴՆԹ-ների հալման ջերմաստիձանն ընկած է նշված տիրույթում՝ 66 °C < T_m <85 °C, քանի որ դրանք պարունակում են բոլոր չորս ազոտական հիմքերը, բայց կախված կենդանի օրգանիզմի տեսակից՝ տարբերվում են AT- և GC- պարունակությամբ։ Օրինակ՝ մարդու ԴՆԹ-ն բնութագրվում է 81-82 °C հալման ջերմաստիձանով, իսկ E.coli – 90.5 °C.

Անցած դարի 80-ական թվականներին հայտնաբերվել է ԴՆԹ-ի ջերմային հալման հստակ բազմաստիձանությունը, որը հալման կորի վրա դրսևորվում է որպես նուրբ կառուցվածք։ Նուրբ կառուցվածքը առավել ակնհայտ երևում է հալման դիֆերենցիալ կորի վրա, այսինքն՝ $\left(-\frac{\partial \theta}{\partial T}\right)$ -ի ջերմաստիձանից կախվածության վրա (նկ. 7բ)։



Նկ. 7. Հորթի նշագեղձից անջատված ԴՆԹ-ի հալման կորից (ա) և հալման դիֆերենցիալ կորից (բ) հալման ջերմաստիճանի և հալման ինտերվալի որոշման սխեմատիկ պատկերը

Հալման սովորական կորից հալման դիֆերենցիալ կորի անցնելու անհրաժեշտությունը ունի երկու պատձառ։ Նախ՝ ԴՆԹ-ի կառուցվածքային կարգավորման մի շարք առանձնահատկություններ թույլ են դրսևորվում հալման սովորական կորի վրա։ Երկրորդ՝ ավելի զգայուն սպեկտրաֆոտոմետրերի ի հայտ գալը, որոնք հնարավորություն են տալիս օպտիկական խտությունը գրանցել մինչև 10⁻⁴ օպտիկական միավոր ձշգրտությամբ։ Դա հնարավորություն տվեց բացահայտել մի շարք ֆագերի ԴՆԹ-ի նուրբ կառուցվածքը (0,3 - 0,6 ⁰C լայնությամբ գագաթներ), որը պայմանավորված էր 500 զույգ հիմքերից բաղկացած հատվածների (դոմենների) «ամեն ինչ կամ ոչինչ» սկզբունքով՝ կոոպերատիվ հալման պատձառով։ Եթե բնական ԴՆԹ-ն պարունակում է 5․10⁴-ից պակաս զույգ ազոտական հիմք (պլազմիդային ԴՆԹ, ֆագերի և վիրուսների ԴՆԹ), ապա այն հնարավոր է անջատել և պահպանել առանց վնասման։ Այս դեպքում բոլոր մոլեկուլներն ունեն նույն հաջորդականությունը և նրանք հալվում են նույն ձևով. տվյալ ջերմաստիձանում բոլոր մոլեկուլներում հալված են համարյա նույն տեղամասերը։

Դիֆերենցիալ հալման կորը կարելի է ստանալ նորմավորված ՈւՄ-հալման կորերի թվային դիֆերենցմամբ։

Հալման ընթացքում հիպերքրոմային էֆեկտը քանակապես գնահատվում է հետևյալ բանաձևով.

$$\Delta H = \frac{A_{\rm max} - A_{\rm min}}{A_{\rm min}} 100\% : (15)$$

ԴՆԹ-ի համար **ΔH=30%~40%**։

ԴՆԹ-ի մոլեկուլի հալումը մասնակի շրջելի պրոցես է։ Երբ ԴՆԹ-ի տաքացված լուծույթները դանդաղորեն սառչում են, ապա հավանականությունն այն բանի, որ կոմպլեմենտար զույգերը կհանդիպեն և կառաջանան ջրածնային կապեր, բավականին մեծ է։ Կծիկի որոշ տեղամասերում վերականգնվում է պարուրային կոնֆորմացիան։ Այս գործընթացը կոչվում է ռենատուրացիա, այսպիսով ռենատուրացիան ԴՆԹ-ի կրկնակի շղթայի ձևավորման գործընթացն է դենատուրացված կոմպլեմենտար միաշղթաներից, որոնք Ճկուն շղթաներ են։ Այն ներառում է ազոտական հիմքերի միջև ջրածնային կապերի վերականգնում կամ ձևավորում։ Պետք է նշել, որ ԴՆԹ-ի հայումը կամ բաժանումը երկու առանձին կոմպյեմենտար շղթաների մոնոմոլեկուլային ռեակցիա է և, հետևաբար, երկշղթա ԴՆԹ-ի մոլեկույների հայման արագությունը կախված չէ ԴՆԹ-ի կոնցենտրացիայից։ Իսկ երկու առանձին շղթաների միավորումը` ռենատուրացիան, երկմոլեկույային ռեակցիա է։ Երկու կոմպլեմենտար միաթելերը պետք է հանդիպեն միմյանց, այնուհետև երկու թելերի միջև ձևավորվեն կոմպլեմենտար հիմքերի զույգեր։ Եթե ԴՆԹ-ի մոլեկույր շատ երկար է, ապա վերականգնումը կարող է լիարժեք չլինել։ Այս պրոցեսը կախված է ԴՆԹ-ի կոնցենտրացիայից, ինչպես նաև պրոցեսի տևողությունից։ Որքան բարձր է ԴՆԹ-ի կոնցենտրացիան, այնքան ավելի արագ է տեղի ունենում ռենատուրացիան։ Պրոցեսը նկարագրող մեծությունը որոշվում է որպես կոնցենտրացիայի և արագության արտադրյալ՝ C₀ x t։ Նկար 8-ում ներկայացված է ԴՆԹ-ի միաթել շղթաների հիբրիդացման կորը։



Նկ. 8. ԴՆԹ-ի հիբրիդացման կոր

Cot (ԴՆԹ-ի կոնցենտրացիա x ժամանակ) մեծությունը գտնվում է X առանցքի վրա, իսկ միաթել ԴՆԹ-ի մասը՝ Y աոանցքի վրա։ Կորի սկիզբը, որը գտնվում է Y առանցքի ձախ անկյունում, համապատասխանում է հիբրիդացման պրոցեսի սկզբին։ X առանցքի վրա 1 կամ 100% արժեքները համապատասխանում են ԴՆԹ-ի լրիվ միաթել վիճակում գտնվելու պայմանին։ Ժամանակի ընթացքում ԴՆԹ-ի միաթելերը միավորվում են՝ առաջացնելով երկթել կառուցվածք, և միաթել վիճակում գտնվող ԴՆԹ-ի մասնաբաժինը փոքրանում է։ Երբ ամբողջ ԴՆԹ-ն հիբրիդացվում է (ռենատուրացվում է), միաթել ԴՆԹ-ի մասնաբաժինը կամ տոկոսը հավասարվում է 0-ի։ Այն կետը որում ռենատուրացված է ԴՆԹ-ի մոլեկուլների կեսը նշանակվում է Coti/2. Նկար 8-ում ներկայացված կորը ցույց է տալիս, թե ինչպես է հիբրիդացման արագությունը կախված ջերմաստիձանից։



Նկ. 9. Հիբրիդացման արագության կախվածությունը ջերմաստիձանից

ԴՆԹ-ի հալումը և ռենատուրացիան ընկած են ԴՆԹ հիբրիդացման հիմքում։ Հիբրիդացումը մեթոդ է, որն օգտագործվում է ԴՆԹ-ի երկու նմուշների փոխադարձ համապատասխանությունը որոշելու և ԴՆԹ-ի տարբեր մոլեկուլներ պարունակող լուծույթում ԴՆԹ-ի անհրաժեշտ մոլեկուլների հայտնաբերման և մեկուսացման համար։

Շատ դեպքերում անհրաժեշտ է լինում առավելագույնին հասցնել հիբրիդացման արագությունը, ինչի համար սովորաբար հիբրիդացումը արվում է 15 °C ջերմաստիձանից ցածր ջերմաստիձաններում։ Հիբրիդիզացումն արվում է նաև աղի բարձր կոնցենտրացիաների դեպքում, որպեսզի նվազագույնի հասցվի շաքարա-ֆոսֆատային կմախքների միջև վանողությունը։

3.2. ԴՆԹ-Ի ՋԵՐՄԱՍՏԻՃԱՆԱՅԻՆ ՀԱԼՄԱՆ ՍՊԵԿՏՐԱՅԻՆ ԿՈՐԵՐԻ ՓՈՐՁԱՐԱՐԱԿԱՆ ՍՏԱՑՈՒՄԸ

ԴՆԹ-ի ջերմային հալումը, ուսումնասիրվելու է Lambda-800 սպեկտրաֆոտոմետրի օգնությամբ։ Ջերմաստիձանը կարգավորվում է PTP-6 Peltie Systems ջերմաստիձանային բլոկի օգնությամբ։ Չափումները կատարվելու են 25°C-95°C ջերմաստիձանային տիրույթում, հերմետիկ փակվող քվարցե սրվակի մեջ, որի հաստությունը 1սմ է, իսկ ծավալը՝ 1.2 մլ։ Ջերմաստիձանը բարձրացվելու է 0.3-0.5 °C /րոպե հաստատուն արագությամբ։

ԴՆԹ-ի լուծույթի պատրաստումը

Աշխատանքում օգտագործվելու է հորթի նշագեղձից անջատված գերմաքուր ԴՆԹ։ Չափումները կատարվելու են 0,1 BPSE բուֆերային լուծույթում (1 BPSE = 6 mM Na₂HPO₄ + 2 mM NaPO₄ + 185 mM NaCl+1mM EDTA), pH = 7.2։ Անհրաժեշտության դեպքում լուծույթի pH-ը կարգավորվելու է հետազոտվող լուծույթին թթվի՝ HCl կամ NaOH միկրոքանակների ավելացմամբ։

ԴՆԹ-ի հալման ուսումնասիրումը կլանման սպեկտրակոպիայի մեթոդով.

1. Լցնել 1մլ ԴՆԹ-ի լուծույթ սրվակի մեջ և գրանցել օպտիկական խտության արժեքը 260 նմ ալիքի երկարության տակ՝ գծելով լուծույթի կլանման սպեկտրը 220-320նմ տիրույթում 25 °C-ում։

2. Ստանալ ԴՆԹ-ի հալման կորը։ Ստացված ԴնԹ-ի հալման կորը բնութագրվում է սիգմոիդալ տեսքով, որի սկզբնական հատվածը (ցածր ջերմաստիձանային տիրույթ) համապատասխանում է պարույր վիձակին, իսկ բարձր ջերմաստիձանային տիրույթը, երբ օպտիկական խտությունը այլևս չի փոփոխվում՝ կծիկ վիձակին։

3. Ստացված սիգմոիդալ հալման կորի օգնությամբ որոշել ԴՆԹ-ի հալման ջերմաստիձանի արժեքը՝ Τ_m-ը, հալման ինտերվալը՝ ΔT-ն և հիպերքրոմ էֆեկտը՝ ΔH։

4. Հալման պրոցեսի ավարտից հետո կրկին գրանցել լուծույթի կլանման սպեկտրը 220-320 նմ տիրույթում 95 °C-ում։ Այնուհետև համեմատել 260 նմ ալիքի երկարության դեպքում օպտիկական խտության արժեքները 25 °C և 95 °C ջերմաստի-Ճաններում և հաշվել ΔΗ հիպերքրոմ էֆեկտն ըստ (15) բանաձևի։

5. Հաշվել A₂₆₀/A₂₈₀ և A₂₆₀/A₂₃₀ արժեքները, որոնք թույլ են տալիս գնահատել ԴՆԹ-ի մաքրությունը՝ ելնելով այն բանից, որ A₂₆₀/A₂₈₀ = 1.8 \div 1.9, իսկ A₂₆₀/A₂₃₀ = 2.2 \div 2.4 արժեքների դեպքում համապատախանաբար սպիտակուցների և ՌՆԹ-ի պարունակությունը < 1%-ից։

3.3. ԴԻՖԵՐԵՆՑԻԱԼ ՍԿԱՆԱՎՈՐՈՂ ԿԱԼՈՐԻՄԵՏՐԻԿ ՄԵԹՈԴ

Դիֆերենցիալ սկանավորման կալորիմետրիան (Differential Scanning Calorimetry) մակրոմոլեկույների ջերմադինամիկական հատկությունների որոշման հզոր փորձարարական մեթոդ է։ Այն համարվում է ԴՆԹ-ի պարույր-կծիկ անցումը ուսումնասիրելու լավագույն մեթոդներից մեկը։ ԴՆԹ-ի կրկնակի կոմպլեմենտար շղթաների հայտնաբերումից և այն փաստից հետո, որ դրանց տարանջատումը առանցքային գործընթաց է գենետիկական տեղեկատվության բազմապատկման համար, անմիջապես մեծացավ հետաքրքրությունը այս մոլեկույային կառուցվածքի էներգետիկ կողմի նկատմամբ։ Սակայն, արդեն իսկ, առաջին փորձերը ցույց տվեցին, որ երկար և անհամասեռ հաջորդականությամբ բնական ԴՆԹ-ի «բացմանռեֆոլդինգի» ջերմադինամիկական ուսումնասիրությունը հեռու է պարզ լինելուց, քանի որ շղթաների անջատման պրոցեսը պարզ չէ։ Քանի որ անջատված թելերն այլևս լիովին չեն կարող գտնել իրենց Ճիշտ տեղավորումը, ապա այդ պրոցեսը նաև անշրջելի է։ Ուստի ամբողջ ուշադրությունը կենտրոնացած էր սինթետիկ հոմոպոլինուկլեոտիդների վրա, որոնց շղթաների անջատման և միացման պրոցեսները բավականին պարզ են և շրջելի։ Երկար հոմոպոլինուկլեոտիդները կարող են հեշտությամբ սինթեզվել, բայց, ցավոք, դրանք նույնական չեն լինում երկարությամբ և, համապատասխանաբար, ստացված դուպլեքսները 100% պարուրաձև չեն։ Որոշակի հաջորդականությամբ հետերո-պոյինուկյեոտիդների սինթեզը շատ ավելի թանկ է, հետևաբար դրանք չեն կարող չափազանց երկար լինել։ Բացի այդ, թեև դրանք կարող են լինել ձշգրիտ կոմպլեմենտար և նրանց միավորումն ու անջատումը շրջելի պրոցեսներ են, կարձ դուպլեքսների համար եզրային պայմանները (ծայրերի ներդրումն) այլևս աննշան չեն։ Այս երկու դեպքերի վերաբերյալ մյուս խնդիրն այն էր, որ տարանջատված շղթաները սովորաբար ամբողջությամբ չեն բացվում, այլ ունենում են որոշակի մնացորդային կառուցվածք, որը պետք է հաշվի առնել երկու լրիվ բացված կոմպլեմենտար թելերից կրկնակի պարույրի ձևավորման ջերմադինամիկան ուսումնասիրելիս։

Գոյություն ունեն տարբեր սկանավորող կալորիմետրեր՝ կախված կիրառություններից և փորձարկվող նմուշներից, բայց դրանք բոլորն ունեն երեք հիմնական բնութագրիչ։ Առաջին՝ կալորիմետրերը պետք է կարողանան չափել ջերմաստիձանի փոփոխությունները, պահպանել տաքացման կամ հովացման հաստատուն արագությունը և ձշգրիտ կատարել ջերմաստիձանի չափումները։ Երկրորդ՝ գործիքները պետք է ձշգրիտ չափեն նմուշի և համեմատման բջիջների միջև ջերմային հոսքերի տարբերությունը, ինչը կհանգեցնի բազային գծի կայունությանն ու աղմուկի նվազեցմանը։ Երրորդ՝ բջիջների պարունակությունը սովորաբար չափվում է ծավալով (հին կալորիմետրներում օգտագործվում էր զանգվածը), ինչը էական նշանակություն ունի վերարտադրելի և ձշգրիտ արժեքներ ստանալու համար։

Դիֆերենցիալ սկանավորող կալորիմետրը (ԴՍԿ) չափում է հետազոտվող կենսաբանական համակարգի մասնակի մոլային ջերմունակության փոփոխությունը հաստատուն Ճնշման դեպքում (ΔCp)՝ կախված ջերմաստիՃանից։

ԴՆԹ-ի համար ստացված դիֆերենցիալ սկանավորող կա-

լորիմետրիկ կորի օրինակը ներկայացված է նկ. 10-ում։



Նկ. 10. Հորթի նշագեղձից անջատված ԴՆԹ-ի դիֆերենցիալ սկանավորող կալորիմետրիկ կոր։ Կորով սահմանափակված մակերեսը հավասար է պարույր-կծիկ անցման էնթալպիային ՝ΔН=8857 կալ/մпլ:

ΔCp-ի ինտեգրումը ջերմաստիձանների տրված տիրույթում համակարգի էնթալպիան է՝

$$\Delta H_{cal} = \int_{T_1}^{T_2} \Delta C_p dT:$$
 (16)

Էնտրոպիան որոշվում է ΔCp/T-ով՝ կախված T-ից կորի տակ գտնվող մակերեսից`

$$\Delta S_{cal} = \int_{T_1}^{T_2} \frac{\Delta C_p}{T} dT :$$
(17)

Համակարգի Գիբսի ազատ էներգիան (Գիբսի ջերմադինամիկական պոտենցիալ) տվյալ ջերմաստիձանում կարող է որոշվել հետևյալ բանաձևով՝

$$\Delta G_{T} = \Delta H_{cal} - T \Delta S_{cal} :$$
 (18)

Այժմ քննարկենք տարբեր ջերմադինամիկական պարամետրերի, փոփոխությունը ԴՆԹ-ի մոլեկուլի հալման կամ հիբրիդացման պրոցեսների օրինակով։

ա. Էնթալպիայի փոփոխություն

Նախ հիշենք, թե ինչ է նշանակում ջերմադինամիկական պարամետրեր կամ պոտենցիալներ։ Ջերմադինամիկական պոտենցիալներ են անվանվում վիճակի ֆունկցիաները։ Գոյություն ունեն բազմաթիվ ջերմադինամիկական պոտենցիալներ, քանի որ, եթե հայտնի է նրանցից մեկը, ապա նրա կամայական ֆունկցիան ևս վիճակի ֆունկցիա է։

Մոլեկուլային ֆիզիկայի դասընթացից արդեն ծանոթացել ենք մի շարք ջերմադինամիկական պոտենցիալների հետ, որոնք նկարագրում են համակարգի վիճակը։ Դրանք են ճնշումը (P), ծավալը (V), ջերմաստիճանը (T), ներքին էներգիան (U), էնթալպիան (H), էնտրոպիան (S) և այլն։

Այսպիսով, էնթալպիան վիճակի ֆունկցիա է, որի աճը քվազիհավասարակշիռ իզոբար պրոցեսներում հավասար է համակարգի կողմից ստացված էներգիային։

ԴՆԹ-ի հալման համատեքստում կոմպլեմենտար ազոտական հիմքերի (ադենին-տիմին կամ գուանին-ցիտոզին) միջն ջրածնային կապերի խզումը պահանջում է էներգիա, ինչը հանգեցնում է էնթալպիայի դրական աձին այս պրոցեսի ընթացքում։ Ջերմաստիձանի բարձրացմանը զուգահեռ ԴՆԹ-ի լուծույթին փոխանցված ջերմային էներգիան նպաստում է այդ ջրածնային կապերի խզմանը։ Հետևաբար դրական ΔH-ն արտացոլում է ԴՆԹ-ի հալման պրոցեսի էնդոթերմիկ բնույթը։

բ. Էնտրոպիայի փոփոխություն

Հաշվումները ցույց են տալիս, որ հավասարակշիռ պրոցեսների համար չնայած ծQ -ն վիձակի ֆունկցիա չէ, սակայն ծQ/T հարաբերությունը լրիվ դիֆերենցիալ է, այսինքն` վիձակի ֆունկցիա է։ Այն վիձակի ֆունկցիան, որի դիֆերենցիալը մեծությունն է կոչվում է էնտրոպիա և նշանակվում է Տ տառով։ Հետևաբար

$$dS = \delta Q/T$$
$$\Delta S = S_2 - S_1,$$

որտեղ Տ_{1-ը} և Տ_{2-ը} համակարգի էնտրոպիայի արժեքներն են, համապատասխանաբար, վերջնական և սկզբնական վիձակներում։

Մյուս կողմից համակարգի էնտրոպիայի ֆիզիկական իմաստը կարելի է մեկնաբանել մոլեկուլային կինետիկ տեսության միջոցով։ Ընդհանուր առմամբ էնտրոպիան որոշվում է համակարգ կազմող մասնիկների անկարգավորության աստիՃանով։ Բոլցմանի կողմից ցույց է տրված, որ էնտրոպիան կապված է ջերմադինամիկական հավանականության (W) հետ հետևյալ բանաձևով՝

$$S = k \ln W , (19)$$

որտեղ k-ն Բոլցմանի հաստատունն է, W-ն՝ համակարգի տվյալ մակրովիձակն իրականացնող միկրովիձակների թիվը, որը կոչվում է ջերմադինամիկական հավանականություն։

ԴՆԹ-ի մոլեկուլի հալման պրոցեսում, երբ շղթաները բաժանվում են, մոլեկուլը կրկնակի պարուրային կարգավորված կառուցվածքից անցնում է երկու առանձին շղթաների՝ անկարգավորված կառուցվածքի։ Այս «անկարգավորվածության» մեծացումը հանգեցնում է էնտրոպիայի աՃին՝ ΔS>0։

գ. Գիբսի ազատ էներգիայի փոփոխություն

Պրոցեսների ընթացքում համակարգի Գիբսի ազատ էներգիայի փոփոխությունը պայմանավորված է համակարգի էնթալպիայի և էնտրոպիայի փոփոխություններով։ ԴՆԹ-ի հալման պրոցեսում դրական ΔΗ-ն դրական ներդրում է կատարում ΔG-ում, ինչը ցույց է տալիս, որ գործընթացը «բարենպաստ» չէ։ Իսկ ΔՏ դրական անդամը բացասական ներդրում է ունենում ΔG-ի արժեքի մեջ՝ դարձնելով Գիբսի ազատ էներգիայի փոփոխությունը ջերմաստիՃանից կախված։

Ջերմաստիձանի աձին զուգահեռ ΤΔՏ անդամի բացասական ներդրումը ΔG-ի արժեքի մեջ ավելի էական է դառնում, հատկապես, որ այն համեմատական է ջերմաստիձանին։ Հալման ջերմաստիձանում (Tm) Գիբսի ազատ էներգիայի փոփոխությունը դառնում է զրո (ΔG = 0), ինչը ցույց է տալիս ԴՆԹ-ի կրկնակի պարուրային և միաթել ձևերի միջն հավասարակշռությունը։ Հալման ջերմաստիձանից ավելի բարձր ջերմաստիձաններում ΔΗ դրական անդամը սկսում է գերակշռել, և ԴՆԹ-ի հալման գործընթացը դառնում է «բարենպաստ»։

Ամփոփելով վերը ասվածը՝ կարող ենք նշել, որ ԴՆԹ-ի հալման ջերմադինամիկան նուրբ հավասարակշռություն է էնթալպիայի և էնտրոպիայի փոփոխությունների միջև։ Դրական ΔΗ-ն արտացոլում է ջրածնային կապերը խզելու համար անհրաժեշտ էներգիան, իսկ դրական ΔՏ-ն արտացոլում է ԴՆԹ-ի շղթաների բաժանումով պայմանավորված համակարգում անկարգավորվածության աՃը։

2.4. ԴՆԹ-Ի ԿԱԼՈՐԻՄԵՏՐԻԿ ԿՈՐԵՐԻ ՓՈՐՁԱՐԱՐԱԿԱՆ ՍՏԱՑՈՒՄԸ

ԴՆԹ-ի ջերմային հալումը ուսումնասիրվում է դիֆերենցիալ սկանավորող միկրոկալորիմետրի օգնությամբ։ Չափումները կատարվում են 25°C-110°C ջերմաստիձանային տիրույթում։ Ջերմաստիձանը փոփոխվում է 1 °C /րոպե հաստատուն արագությամբ։

Կալորիմետրիկ եղանակով որոշված ջերմադինամիկական պարամետրերը մակրոմոլեկուլի համար ջերմա-ֆիզիկական հատկությունների կարևորագույն բնութագրիչներից են։ Այս պարամետրերը ստանալու համար կարևոր է ուշադրություն դարձնել հետևյալ հանգամանքներին.

ա) Ընտրել համապատասխան բուֆերային լուծիչ (pH, իոնական ուժ), որում ուսումնասիրվող ԴՆԹ-ները (սպիտակուցներ, նուկլեինաթթուներ և այլն) չեն միավորվում ուսումնասիրված ջերմաստիձանի ողջ տիրույթում, և լուծույթի pH-ը շատ չի փոխվում տաքացման ժամանակ։

բ) Պատրաստել ուսումնասիրվող նյութերի լուծույթը ընտրված լուծիչում անհրաժեշտ կոնցենտրացիայով և հավասարակշռել լուծիչի դեմ դիալիզի միջոցով։ Կոնցենտրացիայի որոշման սխալը չպետք է գերազանցի 3%-ը։

գ) Բոլոր փորձերը պետք է իրականացնել 2 մթնոլորտից ոչ պակաս Ճնշման տակ, որպեսզի տաքացման ընթացքում պղպջակների առաջացումը կանխվի։

Փորձի ընթացքը.

- Լուծիչը լցնել երկու բջիջների մեջ և մի քանի անգամ սկանավորել, մինչև ելակետային գիծը (базовая линия) կայունանա:
- 2. Կալորիմետրի բջիջներից մեկում լուծիչը փոխարինել ուսումնասիրվող լուծույթով։ Պետք է նկատի ունենալ, որ դա արվում է առանց սկանավորումը դադարեցնելու հենց այն պահին, երբ բջիջներում ջերմաստիձանը մոտ է սենյակային ջերմաստիձանին։ Լուծիչը ուսումնասիրվող լուծույթով փոխարինելիս բջիջը պետք է ոչ թե չորացնել, այլ պարզապես լվանալ ուսումնասիրվող լուծույթով։ Բջիջները չորացնելը, կամ դրանք որևէ ագրեսիվ հեղուկով լվանալը, կփոխեն դրանց մակերեսի հատկությունները, և կայուն բազային գծի վերահաստատումը կպահանջի գործիքի բազմաթիվ հետագա սկանավորումներ՝ լուծիչով լցված բջիջներով։
- Ստացված կալորիմետրիկ հալման կորի օգնությամբ որոշել ԴՆԹ-ի հալման ջերմաստիձանի արժեքը՝ Τ_m-ը, հալման ինտերվալը՝ ΔΤ-ն, հալման էնտալպիա (ΔΗ) և էնտրոպիան (ΔS) համապատասխանաբար (16) և (17) բանաձներով։

Գրականության ցանկ

- 1. Jay A. Glasel, Murray P. Deutscher and Murray P. Deutscher "Introduction to Biophysical Methods for Protein and Nucleic Acid Research" Copyright © 1995 Elsevier Inc.
- Максим Франк-Каменецкий "Самая главная молекула: от структуры ДНК к биомедицине XXI века" М.: Альпина нонфикшн, 2017
- А.А. Веденов, А.М. Дыхне, М.Д. Франк-Каменецкий "Переход спираль - клубок в ДНК" Успехи Физических Наук, Том 105, вып. 3, 1971
- 4. Л.Д. Ландау, "Статистическая физика" м. Наука, 1982 С.100.
- 5. Peter L. Privalov "Microcalorimetry of Macromolecules" copyright © 2012 by John Wiley & Sons, inc.
- 6. M.L.M. Anderson "Nucleic Acid Hybridization" 1998 by Garland Science.
- 7. Ландсберг Г. С. "Оптика" Физматлит, 2021.
- Marky LA, Breslauer KJ. "Calculating thermodynamic data for transitions of any molecularity from equilibrium melting curves." Biopolymers. 1987 Sep;26(9):1601-20. doi: 10.1002/bip.360-260911.
- Dragan, A., Privalov, P. & Crane-Robinson, C. Thermodynamics of DNA: heat capacity changes on duplex unfolding. Eur Biophys J 48, 773–779 (2019). https://doi.org/10.1007/s00249-019-01403-1
- Paulius Vaitiekunas, Colyn Crane-Robinson, Peter L. Privalov, The energetic basis of the DNA double helix: a combined microcalorimetric approach, *Nucleic Acids Research*, Volume 43, Issue 17, 30 September 2015, Pages 8577– 8589, https://doi.org/10.1093/nar/gkv812
- 11. Е. Шредингер, "Что такое жизнь?" АСТ, 2023 г.

РЕЗЮМЕ

ПЕРЕХОД СПИРАЛЬ-КЛУБОК В МОЛЕКУЛЕ ДНК

Алоян Лусине Рафиковна

Данное учебное пособие предназначено для студентов старших курсов бакалавриата и магистратуры Института физики Ереванского государственного университета. Оно посвящено вопросам, связанным с переходом спираль-клубок в молекуле ДНК, а также описанию методов экспериментального исследования этого явления. Пособие также может быть полезно студентам, обучающимся по направлениям биологии и химии.

SUMMARY

Helix-coil Transition in the DNA Molecule

Lusine Rafik Aloyan

This educational manual is intended for senior baccalaureate and master's degree students enrolled in the Institute of Physics at Yerevan State University. Focused on the intricacies of the DNA structure and helix-coil transition, it comprehensively explores theoretical concepts and experimental methodologies. While primarily designed for students in the field of physics, this manual can also be useful to students, who study biology and chemistry.

Բովանդակություն

ՆԵՐԱԾՈՒԹՅՈՒՆ3
ԳԼՈՒԽ 1. ԴՆԹ-Ի ԿԱՌՈՒՑՎԱԾՔՆ ՈՒ
ԱՌԱՆՁՆԱՀԱՏԿՈՒԹՅՈՒՆՆԵՐԸ6
1.1. ԴՆԹ-Ի ԿԱՌՈՒՑՎԱԾՔԸ։
ባԱՐበՒՅՐ-ԿԾԻԿ ԱՆՑՈՒՄԸ6
1.2. ԴՆԹ-Ի ՊԱՐՈՒՅՐ-ԿԾԻԿ ԱՆՑՄԱՆ ՊՐՈՑԵՍԻ
ՆԿԱՐԱԳՐՈՒԹՅՈՒՆԸ (ԻԶԻՆԳԻ ՄՈԴԵԼ)14
1.3.1. ԼՈՒԾՈՒՅԹԻ ԻՈՆԱԿԱՆ ՈՒԺ։
ԴՐԱ ԱԶԴԵՑՈՒԹՅՈՒՆԸ ՀԱԼՄԱՆ ՊՐՈՑԵՍԻ ՎՐԱ
1.3.2. ԼՈՒԾՈՒՅԹԻ ℙℍ ԴՐԱ ԱԶԴԵՑՈՒԹՅՈՒՆԸ ՀԱԼՄԱՆ
ግՐበՑԵՍԻ ՎՐԱ22
1.4. ԴՆԹ-Ի ՄՈԼԵԿՈՒԼԻ ՀԻԴՐԱՏԱՑԻԱ25
ԳԼՈՒԽ 2. ԴՆԹ-Ի ՀԱԼՄԱՆ ՓՈՐՁԱՐԱՐԱԿԱՆ
ՀԵՏԱՉՈՏՄԱՆ ՄԵԹՈԴՆԵՐԸ27
2.1. ՈՒԼՏՐԱՄԱՆՈՒՇԱԿԱԳՈՒՅՆ ԿԼԱՆՄԱՆ
ሀՊԵԿՏՐԱՍԿՈՊԻԿ ՄԵԹՈԴ27
3.2. ԴՆԹ-Ի ՋԵՐՄԱՍՏԻՃԱՆԱՅԻՆ ՀԱԼՄԱՆ ՍՊԵԿՏՐԱՅԻՆ
ԿበՐԵՐԻ ՓՈՐՁԱՐԱՐԱԿԱՆ ՍՏԱՑՈՒՄԸ36
3.3. ԴԻՖԵՐԵՆՑԻԱԼ ՍԿԱՆԱՎՈՐՈՂ ԿԱԼՈՐԻՄԵՏՐԻԿ
ሆԵԹበԴ
2.4. ԴՆԹ-Ի ԿԱԼՈՐԻՄԵՏՐԻԿ ԿՈՐԵՐԻ
ወበՐՁԱՐԱՐԱՆԱԿԱՆ ՍՏԱՑՈՒՄԸ44
ዓՐԱԿԱՆበՒԹՅԱՆ ՑԱՆԿ46
РЕЗЮМЕ
SUMMARY

ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆ

ԼՈՒՍԻՆԵ ՌԱՖԻԿԻ ԱԼՈՅԱՆ

ՊԱՐՈՒՅՐ-ԿԾԻԿ ԱՆՑՈՒՄԸ ԴՆԹ-Ի ՄՈԼԵԿՈՒԼՈՒՄ

Ուսումնամեթոդական ձեռնարկ

Հրատ. պատ. խմբագիր՝ Լ. Հովհաննիսյան Համակարգչային ձևավորումը՝ Կ. Չալաբյանի Կազմի ձևավորումը՝ Ա. Պատվականյանի Հրատ. սրբագրումը՝ Ա. Գույումջյանի

Հեղինակը հաստատում է, որ ծանոթ է «ԵՊՀ գրահրատարակչական քաղաքականությանը», և գրքում առկա փաստերը, դիրքորոշումները, կարծիքները շարադրված են հեղինակային իրավունքի և էթիկայի միջազգայնորեն ընդունված սկզբունքների պահպանմամբ։

> Ստորագրված է տպագրության՝ 15.04.2024։ Չափսը՝ 60x84 ¼ւց՝ Տպ. մամուլը՝ 3.125։ Տպաքանակը՝ 100։

ԵՊՀ հրատարակչություն ք. Երևան, 0025, Ալեք Մանուկյան 1 www.publishing.ysu.am

